

**Date – 05/08/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Mizoram Assembly Fur thutkhawm, tun thla August ni 20 a tan tur chu ni 2 chauh awh tura ruahman a ni.**
- 2. India Meteorological Department chuan vawiin atanga Zirtawpni inkar chung hian Mizoram hmun hrang hrangah ruah tam tak sur thei reng a nih thu a sawi.**
- 3. President Draupadi Murmu-i chuan ram pathum Fiji, New Zealand leh Timor-Leste tlawh turin nimin tlai khan a zinchhuak.**
- 4. Paris Olympic neih mekah India mipa hockey team te chuan Great Britain hnehin Semi Final an lut.**

<><><>

**ASSEMBLY**

**Mizoram Assembly Fur thutkhawm, tun thla August ni 20 a tan tur chu ni 2 chauh awh tura ruahman a ni.**

**Mizoram Assembly Fur thutkhawm hi tun thla ni 20 a tan turin larsap Hari Babu Kambhampati chuan a kova. Assembly inkhawm hun hman dan tur rela Speaker Pu Lalbiakzama hova Ningani-a legislature party hrang hrang aiawh telna Business Advisory Committee (BAC) thukhawm chuan ni hnih chung thutkhawm ni se tih an rel a. Assembly Secretariat atanga thu dawn danin sorkar lam atanga dan siam tur pakhat chauh a la luh avang leh luh belh tur a awm em tih hriat theih mai a nih loh avangin August ni 20 a tan hi a tuk ni 21-a tihtawp tura rel a ni a. Ngaihtuah tur dang a**

awm belh chuan inkhawm hi pawhsei theih a nih thu official-te chuan an sawi a ni.

Tuna assembly dinglai hi Mizoram state a nih hnu a assembly 9-na a ni a assembly inkhawm lo awm tur hi a vawi 3-na tur a nih thu official-te chuan an sawi bawk.



#### DRUGS SEIZURE

Kumin January leh July thla inkar (thla 7) chhung khan Mizoram Police leh Excise and Narcotics department hnathawkte chuan heroin kg. 89 leh gram 317 bakah methamphetamine kg. 335 leh gram 605 an man.

Police leh Excise and Narcotics department hotute hnen atanga thu dawn danin Police hian heroin kg. 57 leh gram 126 an man bakah methamphetamine kg. 223 leh gram 77 an man a. Hemi hun chhung vek hian Excise and Narcotics department hnathawkte'n heroin kg. 32 leh gram 191 leh methamphetamine kg. 112 leh gram 528 an man bawk. Police-te hian Ganja 264 leh gram 66 manin Excise and Narcotics hnathawkte hian kg. 436 leh gram 88 an man a, department pahnih man belkhawm hi kg. 682 leh gram 154 a ni. Police hian tun thla 7 kalta chhung vek khan crystal meth kg. 35 leh gram 155 an man a, Excise and Narcotics hian nikum lamah crystal meth hi man nual mah se kumah chuan man an nei lova. Police-in kg. 35 chuang an man hi cheng vaibelchhe 105 leh nuai 46 hu niin an sawi a, crystal meth hralhna rate hi a to hle a, a mum a an hralh methamphetamine aiin a let tam takin a to niin an sawi.

Police hotute chuan tun thla 7 kalta chhunga an heroin man hi cheng vaibelchhe 17 leh nuai 14 hu a ni a, methamphetamine an man hi cheng nuai 29 hu niin an sawi a. Ruihhlo kaihnawih bikah thubuai 236 ziak lutin mi 312 an man a, heroin chungchang bikah thubuai 207 ziaklutin mi 276 zet an man a ni.

Hetih lai hian Excise and Narcotics department-in an chhinchhiah danin kumin January leh July thla tawp inkar chhung khan ruihhlo hmansual avangin mi 44 an thi tawh a, thite hi mipa 37 leh hmeichhia 7 an ni a, an vai hian heroin

hmang thin emaw heroin leh damdawi dang khawih kawp emaw vek an ni. Kum 1984 khan Mizoramah heroin khawih mi 1 thi chhinchhiah hmasak ber a ni a, khami atanga kumin July ni 31 thleng khan ruihhlo vanga nun chan tawh zawng zawng hi mi 1,854 an tling tawh a, an zinga 1,628 hi mipa an ni a, hmeichhia 226 an tel bawk. Kum 2004 kha Mizorama ruihhlo vanga nunna chan tam ber kum niin mi 143, mipa 122 leh hmeichhia 21 an thi a. Kum 1984-a ruihhlo vanga thi chhinchhiah hmasak ber atanga tun thleng hian kum 1986 chiah kha ruihhlo vanga thi chhinchhiah awm loh kum a la ni.



#### CM AS MEDIATOR

Adviser to Chief Minister (Political) Pu Lalmuanpuia Punte chuan Manipur buaina chingfel tura inbiakna atan Chief Minister Pu Lalduhoma'n biak tur pawl bik a sawi lo a ti.

Lamka a Mizo Village Volunteer-te din cham lawmna a Churachandpur-a kal Pu Lalmuanpuia Punte chuan Chief Minister Pu Lalduhoma leh Union Home Minister Amit Shah te inbiakna chanchin a hriat thu leh Manipur Chief Minister N. Biren Singh-a'n Manipur buaina chingfel tura palai hna thawk tura Pu Lalduhoma a sawm thu pawh a lo hriat thu a sawi a. Hemi thu a hriat hian Pu Lalduhoma chu be nghalin Manipur a pawl thenkhatte tel ve se a duh thu leh pawl pakhat hming a sawi ni a chanchin thehdarh awm chu chutianga hming hmerha sawi a neih loh thu a sawi tih Pu Lalduhoma hian a hrilh niin a sawi a. Mizorama a lokir hunah Pu Lalduhoma nen hian kimchang zawka an inbiak tur thu a sawi a. Chief Minister hian hun remchang hmasa bera Manipur a kal a tum thu leh tawiawm tura a duh thu a sawi niin a tarlang bawk a ni.

Ningani khan Pu Lalduhoma hian Delhi-a a chenna inah Amit Shah hi a kawm a. Manipur a buaina chinfel thuai a duh thu leh Manipur Chief Minister-in zin tura a sawm thu a hrilh a. Hemi chungchangah hian Amit Shah chuan Biren Singh-a sawmna anga a tul chuan palai hna thawh pawh tha a tih thu a hrilh niin sorkar thuchhuah chuan a tarlang a ni.



## WARNING

India Meteorological Department chuan vawiin atanga Zirtawpni inkar chung hian Mizoram hmun hrang hrangah ruah tam tak sur thei reng a nih thu a sawi.

Hemi chungchangah hian Mizoram District zawng zawnga bawrhsap, Chairman District Disaster Management Authority ni bawkte chuan ruah tam tak sur thei laka mipuite chhiatna thleng thei lakah fimkhur turin hriattirna an chhuah a. Mipuite chi-ai lo tura hriattirna leh mi tumahin thu belh chian dawl lo hemi chungchangah hian thehdarh loh turin an ngen a.

Amaherawhchu, ruah sur avang hian chhiatna thleng palh thei a nih avangin Village Level Disaster Management Committee te a tul anga lo inring lawk a, harsatna tawk an awm a nih chuan eng tik lai pawhin District Emergency Operation Centre biak pawh theih reng a nih thu chhuah a ni.



## ASF UPDATE

Tun hnai ni 3 chung hian African Swine Fever (ASF) vawk pulhri leng avanga vawk thi an tlem chho tan a, nimin khan district 3-ah vawk 34 a thi.

Animal Husbandry and Veterinary department hotute hnen atanga thu dawn danin awk thi hi Lunglei district-ah tam berin khua/veng 7-ah 24 a thi a. A thih tam berna thin Aizawl district-a khaw 2-ah 3 a thi thung a, Hnahthial district-a Hnahthial khuaah 7 a thi bawk. Zirtawpni khan vawk 91 thi-in inrinni khan 73 a thi a, tun hnai ni khata za tling lo vawk an thih lehna hmasa ber a ni a. Heti hian kumin February ni 9-a Champhai district Leithum khua a ASF vawk pulhri avanga vawk thi an hmuhchhuah leh atang khan vawk pulhri avangin vawk 8,718 a thihna a ni a. Tun dinhmunah khua/veng 200-ah vawk pulhri hi a leng mek a ni.

ASF vawk pulhri a darh zel lohna atan nimin khan vawk 59 suat a ni a. Kumin chhunga vawk suat tawh zat hi 16,158 a tling tawh a ni.



MZP

Govt. Champhai College-a Economics & Political Science zirtirtu indaih lohna avanga sawrkar nawrna tura hma an lak mek chu chhunzawm zel an tum.

Hemi chungchangah hian Inrinni zan khan MZP Hqrs. Champhai chu an President Lalruatdika te chenna Inah Executive Emergency Committee an thukhawm a, thuchhuah siam nghalin, August ni 2-ah Mizo Zirlai Pawl Headquarters Champhai chuan lungawi lohna lantir in College zirtirtu leh zirlaite class kal tur dan a nih hnu-ah August ni 3-ah Sawrkar nen an inbia a. Sawrkar lam harsatna leh an tum dante hrilh hriat an nih hnu-ah tun maiah chuan zirtirtu pek theih a nih loh thu hrilh an ni a. College-in zirtirtu an mamawh tawh dante ngaihtuah a nih hnu-ah Executive Committee in ngun takin a ngaihtuah a zirtirtu hnawhkhah chu thil theih ni a a hriat avangin Sawrkar ngenna zahawm a tih rualin thu an lo chhuah tawh angin lungawi lohna lantir chhunzawm na'n vawiin atangin Zirna In zawng zawng leh Sawrkar Pisa kai tur dan a tum chu a kaltlangpui dawn tih an puangzar nghal a. Pisa an dan tur zingah hian Bank leh Hospital O.P.D te chu a huam lo ang.

MZP Hqrs.chuan vawiin-a pisa leh Zirna In a kai tur dangtu tur, Duty te pawh an ruahman nghal vek a ni.

Mizoram Sawrkar aiawhte, Champhai North bialtu MLA leh Champhai DEO leh SDEO te pawhin zirna tibahlah zawnga chet la lo turin MZP Hqrs. hruaitute chu an ngen bakah August thla chhungin College zirtirtu siamrem (Rationalization) tum a niin chumi chu lo nghak hram turin an ngen a, mahse, Inrinni a Executive Emergency Committee chuan ruahmanna an lo siam tawh ang a kaltlang zel ni se an ti ta a ni.



## PRESIDENT MURMU

President Draupadi Murmu-i chuan ram pathum Fiji, New Zealand leh Timor-Leste tlawh turin nimin tlai khan a zinchhuak. External Affairs ministry sawidanin President Murmu-i hian Fiji a tlawh hmasa ber dawn a, hetah hian Fiji President Katonivere leh Prime Minister Sitiveni Rabuka te nen an inkawm ang.

New Zealand-a a cham chhungin Governor General Cindy Kiro leh Prime Minister Christopher Luxon te a hmu ang a. Internation Education Conference ah hun a hmang bawk ang.

President hian a August ni 10 ah Timor-Leste President Jose Ramos- Horta a kawm ang a. Hei bakah hian Timor-Leste Prime Minister Kay Rala "Xanana" Gusmao a hmu bawk ang.



## PARIS OLYMPIC

Paris Olympic neih mekah India mipa hockey team te chuan Great Britain hnehin Semi Final an lut. Hetihlai hian badminton mipaah Lakshya Sen chuan Smeimfinal ah Denmark player Viktor Axelsen a hneh lo a. Sen-a hian Malaysia player Lee Zii Jia nen bronze medal inchuhin an inkhel leh ang.

Medal la tura beisei hmeichhe boxer Lovina Borgohain chuan kg 75 quarter-final ah chak zo loin China boxer Li Qian a hneh lo a ni.



## IMD

India Meteorological Department chuan state thenkhat ah ruah nasa tak a sur dawn avangin mipuite fimkhur turin a chah. IMD sawidanin Madhya Pradesh, Rajasthan khawchhak, Gujarat leh Maharastra ah te ruah a sur nasa hle dawn niin a hrihl lawk a. Jammu & Kashmir, Himachal Pradesh, Uttarakhand leh Rajasthan-ah te tek leh thli a thawk dawn bawk a. Hei bakah hian chawlhkar khat lo awm

**tur chung ramchung chhak lam leh hmarchhakah te ruah  
leh thli thawk turin a hrilhlawk bawk a ni.**

